

LA BUINE GNOVE: IL CENTRI DI DOCUMENTAZION PE SCUELE FURLANE

Il 2016 al à puartât une buine gnove pe nestre scuele. I mestris che a vuelin insegnâ la marilenghe e in marilenghe a podaran contâ suntun jutori une vore impuartant: al è difat nassût il “Centri di documentazion, ricercje e sperimentazion didatiche pe scuele furlane”, une realtât che ducj i nestris insegnants a spietavin di un grum di timp. Al covente difat un pont di riferiment par ducj chei che a cirin di cognossi e imitâ lis buinis praticjis fin cumò aplicadis dai nestris insegnants. E il Centri si occuperà propit di tirâ dongje i materiâi, lis ideis, lis technichis e i progjets che fin cumò a àn insiorade la scuele di chenti.

E no dome par braure, ma ancje par necessitât: par puartâ indevant e slargjâ simpri di plui lis esperiencis inovativis e je par sigûr necessarie tante buine volontât, ma soledut al covente savê di no jessi bessôi,



I presidents de ARLeF e Filologjiche Fabbro e Vicario.

parcè che a son in tancj che a lavorin (e benon) par mostrâ il valôr di une didatiche plurilengâl. Il Centri al cirarà di meti a disposizion dutis chestis risorsis, par fâ cognossi lis tantis bielis iniziativis nassudis tai agns passâts, ma ancje par creâ une rêta di insegnants che a puedin miorâ simpri plui la cuantitât e la cualitât dai progjets pal furlan. E si propon di “meti in rêta” dut ce che di plui inovatîf al vignarà realizât, soledut i prodots didatics multimediâi che a stan cjapant simpri plui pît tes aulis dal Friûl.

A volê cun fuarce l'istituzion di cheste gnove strutture a son stâts l'ARLeF e la Societât Filologjiche che a àn firmât un protocol d'intese, mots de dibisugne di indreçâ i insegnants viers di une formazion continue. Par ches a son stâts in cunvigne, daûr dal Plan Gjenerâl di Politiche Linguistiche fat bon de Region, di meti in



Fabbro e Vicario cu la Assessore regionâl ae Istruzion L. Panariti.



Un moment de conference stampa di presentazion.

pîts un Centri che al sostignarà la didatiche dal furlan e pal furlan, dant visibilitât e difusion a ducj i progjets plui valits sperimentâts fin cumò. Par chest il Centri al sarà ospitat de Biblioteche de Societât Filologjiche dulà che di agns za si è ingrumât tant di ce che lis scuolis a vevin fat intai agns passâts. In gracie dal lavôr di mestris plens di amôr pe lenghe furlane come Lucio Peressi, Pierino Donada e tancj altris la racuelte di materiâi, libris e progjets e je za siore di robis une vore interessantis par cui che al vûl insegnâ il furlan.

La volontât dal centri e je chê di fâ cressi une vore cheste racuelte lant a tamesâ ducj i ambits scolastics e domandant il jutori di dirigjents e insegnants ancje par realizâ unitâts didatichis validis e funzionâls par ducj i mestris, come chês za metudis dongje in “Marilenghe te scuele”, une bieles publicazion che in cinc volumuts, un par ogni classe des scuolis elementârs, che e sarà consegnade a ducj i insegnants dal Elenc regionâl dai docents che a puedin insegnâ in marilenghe.

Chest al sucedarà inte convigne di presentazion dal Centri che si davuelzarà ai 22 di Fevrâr dal 2017 aes 4 e mieze daspomisdì. In chê ocasion i mestris che a àn za sperimentât l’insegnament e la valutazion di chescj percors ju ilustraran ai coleghis: e e sarà dome la prime di tantis altris occasions di confront, informazion e formazion che il Centri si propon di animâ. Une strutture cussì e coventave pardabon: e cumò, biadelore, e je finalmentri pronte a metisi in vore.

Walter Tomada

CENTRI DI DOCUMENTAZION RICERCJE E SPERIMENTAZION DIDATICHE PE SCUELE FURLANE

li de Societât Filologjiche Furlane

Palaç Mantiche, vie Manin 18 – 33100 Udin

di lunis a vinars des 9:00 aes 13:00 e su apontament

tel. 0432.501598 (int. 5)

info@scuelefurlane.it

Segretarie: Antonella Ottogalli

Comitât Tecnic Sientific: Walter Tomada – President

Elisa Mengato, Patrizia Pavatti, Rosalba Perini, Donato Toffoli